



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8



Antony Blinken-i Palestine Tir Abbas den ajurutep



Paris Masters: Djokovic final-i iogo

VOL. XXI NO. 29 (ADOK 29) DIMAPUR TENTONÜ (MONDAY) YIMPOKSÜI (NOVEMBER) 06, 2023 ₹ 5.00

CNCCI-i KCCI nem tenüngsang agütsür

Dimapur, November 5, 2023 (TYO): Kohima Chamber of Commerce and Industry (KCCI)-i Kohima nung shishilembar Anil Choudhary chiochtsü atema mapa tajung inyakba tenüng asanger ta Confederation of Nagaland Chamber of Commerce and Industry (CNCCI)-i ashi.

Naga yimtenren teloki Anil Choudhary pur aotsüsa mapa inyakba shishilembar anema KCCI-i maneni ozüngi melaba mapa inyachtsü tuyur, ta CNCCI-isa ashi.

Ochimashi aser tim masüba inyakba shishilembar kari shishilembar ajak tenüng menüchtsüba atema merenshitsuä ta Media Affairs, CNCCI sangdong ka nung ashi.

Nisung pur aoba inyakyim ya Dimapur nung teimba ataloka liasü saka cancer ka ama iba inyakyim ya Nagaland tesem balala nung inyaker. Iba ya ozüng amertem saksalema maliba ajanga lir, ta parnokisa ashi.

Nagaland nung Hornbill Festival tenzüchtsü lia Kohima nungi shishilembar ka pur aoba ajanga alima nem osang tai sangoktsütsü aser tenüng menük bener artsü anungji sorkari shishilembar aser public kümzüka ayutsüsa mapa inyachtsü ayongzüker, ta CNCCI-isa ashi.

Kohima aser Dimapur police nati pur aoba shishilembar kümzüka atema tenüngsang agütsür aser Naga nung matsüngdang pa pur aoba Naga yimtenren telok aser pur aoertem tenüng yimjak nung metetdaksütsü akhanger, ta parnokisa ashi.

Talisa shishilembar tem tsüngda senotsü ken o tila kar atema kodaser Naga yimtenren teloki shilem agir ta süngmanga bilemer. Shishilembar pur aoba ya Naga National Movement tenüng menüchtsüba mapa ka lir anungji Naga yimtenren teloktemi pei pei züngsemtem aziüoka ayutsüsa ta CNCCI-isa metetdaksü.

Assam nung taila sen shibelenertem apu Manipur aser Nagaland nungi nisung 2 dena lir

Guwahati, November 5, 2023 (Agencies): Assam kübok Nagaon district nung taila Indian currency notes (FICN) benshir nisung pezü apu aser parnok rongnung Nagaland aser Manipur nungi nisung kaka dena lir.

Osang tejangja ka angazükba sülen Kachua Police Station nungi SI Raja Irshad-i anir police telok kati Uttar Simoluguri tesem nung mita aodang nisung pezü apu.

Iba tesem nung FICN printing machine ka, FICN agi alepbanger

aliba paper bundle ka, mobile handset 3, Rs 500 denomination FICN aser gari ka angu, ta police-i ashi.

Police-i apurtem rongnung Nagaland aser Manipur nungi nisung kaka lir. Tenaji Ukhrul district, Manipur nungi Yuikhan A Shimray (32) aser Chumukedima district, Nagaland nungi Miss Viseno (29) na lir ta jangjaogo.

Maneni, police-isa Nagaon district nungi Md Idrish Ali (57) aser Anuwar Hussain (31) na pua lir.

Manipur-Nagaland arrtsü nung gari aika 200 anendena lir

Imphal, November 5, 2023 (Agencies): All Naga Students' Association Manipur (ANSAM)-i rongsenketzüng mokdangtsü ayongba ajanga Manipur-Nagaland nung aliba National Highway-102 (NH-102) nung khu abenba truck gari noklang 200 tema anendena lir.

ANSAM-i iba mokdang ayonger Deobarnü anogo asembuba süiogo. October 26, 2023 nü Memorandum of Agreement (MoA) nung sign sütepa aliba ama state sorkari mobile internet services lapokang ta takhangba agüja parnoki lungkak aiter.

Assam nungi Dimapur, Nagaland ajanga Imphal-i aoba truck gari 150 shi Khuzama (Nagaland) aser Mao Gate (Manipur) tsüngda anena lir.

Ano, Manipur kübok Senapati district nung Mao-Tadubi, Lairouching aser Mayangkhang nunga gari aika anendena lir.

Kaketshir telok aikati ANSAM-i lungkak aita pusema nungiter. Parnokji Senapati District Students' Association (SDSA), Rongmei Naga Students' Organisation Manipur (RNSOM), Tangkhul Katamnao Saklong (TKS) aser Naga Students' Union Chandel (NSUC) lir.

Iba tebilemstü liaka Manipur sorkari November 5, 2023 aonun 7:45 ako tashi mobile internet services shibangtsü mapang atsülangogo.

Mokdang ayonga liaka Manipur police-i Honibarnü NH-102 nung khu abenba gari 238 tashi senzüdaksüogo ta osang angazüker.

Myanmar Army-i Manipur nung arrtsü shibanger



Imphal, November 5, 2023 (Agencies): Myanmar Army-i Deobarnü Tengenpual district kübok Moreh nung Indo-Myanmar arrtsü shibangogo.

Deobar nungi Myanmar ketdangsurtemi Sagaing region/state nung aliba Namphalong market den sendaktepba Moreh Gate Number One aser Moreh Gate Number Two shibangogo.

Deobar anüngdang mejangjatetba nisung kati Moreh nung aliba Integrated Check Post (ICP) nung injang khaloktsüba sülen Myanmar sorkari iba mapa

inyak. Lendong atalokba sülen security forces aser Manipur police special commandos telok ka ICP tonga ao aser bushisüngdang tenzüokogo.

Külen, October 31, 2023 nü Kuki nung kati SDPO, Moreh Chingtham Anand Kumar khasetba sülen sorkari curfew alitsü ozüng agütsüba Deobarnep 10:00 ako tashi ghonda asem salaa liasü.

Deobarnü tayimtsü ajanga Imphal nungi Moreh tashi additional state forces aser

chiyungtsütem belenogo ta ketdangsurtemi ashi.

Internet shibangba atsülangor:

Manipur sorkari law and order tiptema ayutsü aser osang tai mebelenshitsu atema mobile internet aser data services maneni shibangtsü metetdaksüogo.

Manipur kübok tesem kar nung ozüng alema inyakba ajanga sorkari iba lemtet agi.

Manipur nung November 8, 2023 tashi internet services maneni shibangtsü ta Manipur Home Department-i metetdaksü.

Longchem-Saring apu mapang shitak nung renemtsü

Dimapur, November 5, 2023 (TYO): NPCC Public Grievances Department-i osang kakat nung sangdong agütsüba atema M/s Win Enterprises-i telangzüba agütsüogo.

Longchem-Saring apu ya merenem tashi amshitsu asoshi tamasa apu ka yanglutsü nüngdaker, saka iba lenmang ya

yimtsüng aikati aoba lenmang asünung election mapang yanglutsü tamakoktsü liasü aser election atemba sülen tzüngluruwa aruba ajanga mapaji meinyakteti liasü. Iba jagi apu meyanglutet, ta M/s Win Enterprises-i sangdong ka nung ashi.

Tamasa apu merenem tashi

amshitsu apu ka yanglua sorkari agüja aliba apu aser lenmangji 2023 November ita nungsa tenzüchtsü ta parnoki ashi.

Work order nung mapa renemtsü mapang tasazük agüja aliba shitak nung apu renema yanglutsü ta M/s Win Enterprises-isa metetdaksü.

District 6 CCI-i Commercial Vehicle Owners pusemer

Dimapur, November 5, 2023 (TYO): Mokokchung, Tuensang, Zunheboto, Longleng, Noklak aser Shamator nungi District Chamber of Commerce and Industry (DCCI) temi Commercial Vehicle Owners pusema nungitba metetdaksüogo.

Parnokisa Nagaland sorkar dang ACVOA nem tagütsütsü aliba sen agütsütsü metetdaksüogo.

“Chakka Bandh” ajanga public taküim nung tetsükdaksü ajuruba dang masü saka shishilembar nung rongsenketzüng takoksa tulu ajurur aser temulung melemtep adokdaksür, ta district 6 nungi DCCI temi sangdong ka nung ashi.

2023 Nagaland Legislative Assembly (NLA) election indang

sen magütsüba atema All Commercial Vehicle Owners' Association (ACVOA)-i lungkak aitba pusema nungiter aser sorkar dang iba ken o tekaratiba nung angatetteptsü ayongzüker, ta parnoki ashi.

Nagaland nung sorkar ketdangsubaren ya Kohima, Chumoukedima aser Dimapur ama district tem nung dang masü saka tanüngba district tem-Mokokchung, Zunheboto, Wokha, Tuensang, Shamator, Noklak, Longleng, Kiphire, Mon, Phek, Peren nunga temulung agütsütsüla. Item district nung aliba külem sensotem indang tebilemstütemtemji tongtipang aser sorkari parnok asoshia mapa inyachtsüla ta DCCI 6-i ashi.

November 3, 2023 nungi ACVOA-i “Chakka Bandh” ayongzüka ya parnok tejashi

sayuba lir. Parnok tangutsü tim meshia yimdong nung lungkak aittsüsa akümer. Senotsü magütsüba ajanga gari kiburtemi timtem ajurur aser iba ya sorkar nangzüka ama meinyakba ajanga lir, ta parnokisa metetdaksü.

Nagaland sorkari iba tensa ya maongka ka ama züngshitsu aser ketdangsubaren tajungba akümtsü merangtsüla. Sorkari tesem dak merangloki pei senso tebilemstütem asoshi tashishitsu melii inyachtsü, ta Mokokchung CCI President Tukti Longkumer, Tuensang CCI president Ebesola I Chang, Zunheboto CCI president Kikheto Muru, Longleng CCI president A. Bonshi Phom, Noklak CCI Chongnean aser Shamator CCI president K. Thsantong Yimkhiung nungeri sangdong nung ashi.

Business Association of Nagas ketdangpur tasen melenogo



Business Association of Nagas (BAN) pur ketdangpur tasen shimba sentong nung tangokba noksa angur.

Dimapur, Yimpoksüi/Nov. 05 (TYO): Business Association of Nagas (BAN) pur ketdangpur tasen shima November 4, 2023 nü BAN Conference Hall, DC Court Junction, Dimapur nung tenangzüktep agia alizüing tasen ka tongteta liasü.

Inyakyim yanglushia BAN-i operational tsütsü nükla aser inyakyim ulushia, lenir aser züngsem tasen shima liasü. Iba tenangzüktep sentong agiba ajanga item lenirtemi BAN ya tali terenlokba nung anitsü asoshi bendanga agütsür

inyakba sayur. Sempet tajung aser tajangshiba jenti aliba BAN züngsemtem nungi ketdangpur tasen shimtsü asoshi Zubeno Mozhui ya convener sür committee ka shima liasü.

BAN mangdang nung committee balala indang shilem aser Nagaland nung rongsenketzüing aintsü asoshi lungjemer inyaktü atema BAN tir L Mongkum Jamir-i tayongzükba o jembia liasü.

Iba sentong nung ketdangpur tasen aser standing committee züngsemtem

metetpelatepa liasü, shirnoki BAN mangdang nung aliba ama inyaktzü tenangzükba agia liasü.

BAN lenirtem timba kumshia Vice President tasen pezü aser convenors densema standing committees tasen 19 aser züngsem 60 dak tema liasü.

Parnok moaja Dimapur Ao Baptist Arogo nungi pastor Toshi Longkumer-i sarasademtsü aser I Sashi Pongener, Financial Advisor of BAN aser Retired DGM SBI ajanga tenangzüktep agia liasü.

RPP-i Advisor Yhome den shisa lemsatep

Dimapur, Yimpoksüi/Nov. 05 (TYO): School Education department nung mapa shidak aser tajungba inyakdaksütsü nükjidong nung Rising People's Party (RPP) ketdangsürtemi Advisor, School Education, Dr. Kekhrhie Yhome den senden mena shisa lemsatepa liasü.

Iba senden ya November 3, 2023 nü Dr Yhome'er kidang mena liasü aser iba mapang state nung education system tajungba kumdaksütsü asoshi tongtipang onük kar RPP-i agüja liasü.

Department nung mapang talangka nungi timtem balala ajurua aruba bentettsü asoshi Dr. Yhome-i meranga inyakba atema RPP-i tenüngsang agütsü aser nüngdaka aliba temelenshi arutsü asoshi tebilemba lemsatepa liasü.

RPP ajanga department nung Principal Director post agienba tajungba asütsü ta ashi

asjer ajak asoshi tajungba akumtsü mechi department telungzük nung inyakyim kar melenshitsu tongtipang ta ashi.

'Conflicts of interest' majurutsü mechi Teachers' Recruitment Board ka tentet nung ajungtsü aser iba board yagi tesayurtem shimba maparen meja-meja ketdangsütsü, kechiaser tang aliba recruitment processes nung timtem lir, ta RPP ajanga ashi.

Department-i terenlok maparen nung ranglokba nungi tekeraba nung kaketshir ajungtsü asoshi rangloktsü nüngdakba parnoki lemsatepa liasü. Kaketshir ajung masaba aser junga ketdang masüba ajanga sorkar school tem jenjang tamajung nung lir ta parnoki ashi.

Tesayur, police aser health workers tem itasen memonui agütsüsüla. Tesüiba mapang

tesayurtem itasen meshia longkak aitba ya sorkari shisaliok senzüka yutsüba ajanga lir, ta parnoki ashi.

School Education department asoshi budget timba lemzüksütsü nüngdaker, ta RPP ajanga ashi. Danga sector tem den medemdangra shisaliok asoshi lemzüksütsüba ya kanga tajemba lir, ta ashi.

Yoga tesayur shimtsü ya menüngdak, kechiaser Yoga nung temang aser tanüla densema lir, aser iba yagi state nung sobaliba aser yimya den mapettsü akok, ta ashi.

Iba senden nung department-i Yoga tesayur meshimer, ta Dr. Yhome-i jangjashitsü.

Advisor-isa department telungzük nung temelenshi bener arutsü asoshi bendanga agütsür inyakba lemsatep aser iba atema stakeholders ajungai yaritsü tongtipang lir ta ashi.



"Jawahar Baal Maanch" (Jawahar Children Platform) kübok class 10 tashi azüngertem atema painting tetoktepba ka Nov 3 nü liasü aser iba tetoktepba nung takoker nem District Congress Committee, Mokokchung ajanga tenüngsang agütsüba sentong ka ayongzüka liogo. Iba ya district level sentong ka lir aser yangi takoker angurtemi state level aser national level nung shilem agitsü. National level sentongji taküm küm tatemlen akatsü aser iba nung takoker nem senpet sen lakh ka agütsütsü, ta DCC, Mokokchung osang ka ajanga metetdaksü. Mokokchung, 5th November, 2023

OFFICE OF THE
LANGPANGKONG TZÜKONG MUNGDAK
H.Q. Chuchuyimlang - 798614
Dist. Mokokchung, Nagaland.
ESTD. 1933

Ref. No. Date 05/11/23

LTM SANEN LUDEN SENDEN AYONGER :

Tongtipang ken o tuluka jembitsü alinung 10th November 2023 (Friday) anogo Sanen Luden Senden anepdang 10:00 ako Tzükong Salang HQ Chuchuyimlang nung akatsü aser tanabuba senden 1:00 ako nungi tenzüksü ayonger. Anungji Yimtsüng aser Jila ajak nungi Village Council Chairman / President aser Sanen Luden züngsem den Tzükong Advisor Board aser asen Tzükong meyonga Ao Senden Tongror Luden aser Sanen Luden ajak medema arua atentsü metetdaksür.

Külem Tzükong Wadang nung tenzükur :

Sd/-
(Wb. MARSANEN IMSONG) President LTM

(Wb. R. NUKSHI LONGKUMER) Gen. Secy LTM

Nagaland Angh-i Tokhü Emong salem lemsatep

Dimapur, Yimpoksüi/Nov. 05 (TYO): Lotha nunger adianu aser adianutsür tem dangi Tokhü Emong benjong salem abener, ta Nagaland Angh La Ganesan-i sangdong ka ajanga ashi.

Tokhü Emong ya Lotha nunger aluroba benjong ka lir aser ibai tenüngsang agütsüba benjong ka lir, kong temeim

lemsateper aser lungjemshir. Talisa iba benjong ya temeimtet, tatok agütsütepba mapang lir.

Longjemshia aser asendenshir ka ama nenok liyonga aotsü imlatsür. Nenok ajak anema aliba, tepela, tesunep aser yimchiyimjung temoatsü jenti lidakjang ta moatsür. Tsüngremi Nagaland moajang, ta Nagaland Angh-isa ashi.

Manipur: Minister Nemcha-i IDPs ajuru, sarasademtsü ayongzük



Imphal, Yimpoksüi/Nov. 05 (Agencies): Internally Displaced Persons (IDPs) nem anibelen mesasai teyari agütsütsü meranga Manipur indang Textiles, Commerce and Industry & Cooperation minister Nemcha Kipgen-i Kangpokpi District Hospital nung aliba IDPs meyirijang aika den Deobarnü ajurutepa liasü.

Kangpokpi Assembly Constituency nungi MLA ka ama tang mepetmesü adoka aliba ajanga nüburtem tim atemba lai lemsatepa liasü.

Kangpokpi jila nung amenoka aliba relief camp tem nung IDPs meyirijang aika aliba den ano aika timtem balala mesüra temang manemba mechi para ki nung alir. Item nisungtem jangjateta Kangpokpi Town Committee ajanga Minister Nemcha den lungjemer parnok nem teyari oset balala agüja liasü.

sarasadem den teimla aliba asoshi lai tenüngsang agüja liasü.

IDPs tem dang kati ka den yariteptsü ajungshidang tamang nung metaloka alitsü nüngdak ta lai ashi.

"Asenoki asen tebilemstü khuret Tsüngrem dang ashitsüla, kechiaser Pai asenok nem anisüngzük agütsütsü. Teimla yuang aser tashi ita sarasademang, kechiaser Tsüngremi Pa nütsüngtem kodanga mesendoker," ta Minister Nemcha-i ashi.

Minister Nemcha Kipgen-isa lar constituency nüburtem dang maneni central lenirtem asoshi sarasademtsütsü ayongzük aser tang tebilemstü balala adoka aliba nung lenmang bushirtem nem shisatsü agüjang aser anema yujang ta sarasademtsü ashi. Laisa parnok dang sarasadem nung la asoshia bilemstettsü mepishia liasü.

Iba senden nung Minister Nemcha-i para ki nung aliba IDPs shia nem blanket asemsem lema agüja liasü.

Iba senden nung Evangelist, Rev. Solal-ia Tsüngrem o jembia liasü aser IDPs, Minister Nemcha aser Kuki-Zo kin lenirtem atema sarasademja liasü.



Bhopal, November 05, 2023: Madhya Pradesh nung State Assembly election agitsü mapang ana nung lia Amongnü Bhopal nung state Chief Electoral Officer, Anupam Rajan den tangartemi voters awareness campaign nung shilem agiba noksa nung angur.

S Jaishankar-i Israel Foreign Minister, Eli Cohen den jembia

New Delhi, Yimpoksüi/ November 05 (Agencies): Honibarnü India External Affairs Minister, S Jaishankar-i phone ajanga Israel Foreign Minister, Eli Cohen den jembia tang Israel aser Hamas na tsünga raraba osang metetpelaogo.

Jaishankar-i Israel Foreign Minister dang India-i kiralongra anema maneni raratsü, ta ashiba den külemi pa dang International humanitarian ozüng kübok Gaza nung civilian tem kümzüksü mepishi.

Jaishankar-i X ajanga, "Tanü nikongdang Israel FM, Eli Cohen den jembio. Israel nungeri tensa asadanga osang metetdaksüba atema pelar. India-i maneni kiralongra anema raratsü, international humanitarian ozüng kübok inyaksü aser linük ana tsünga ken o latettsüla, ta pa dang

shiego," ta metetdaksü. Lenir anati tang Gaza nung raraba tensa indang o lemtep aser region nung yimjung alitsü atema lenmang kabosa bushitsüji tongtimbang, ta bangjem.

Jaishankar-i Israel Foreign Minister dang, India-i kiralongra anema maneni raratsü, ta shiba den külemi International ozüng kübok raraba tesemtem nung civilian tembo kümzüksüji kanga tongtimbang, ta ajungshi.

Paisa Cohen dang, Israel-Palestine tsünga mangatetep bentettsü atema linük anati o lemteptsü India-i ajungshir, ta ashi.

Hokolbarnüa Rome nung Senate indang External Affairs & Defence Commission Joint Secretary senden nung jembidang Jaishankar-i Palestine nung nüburtemi timtem balala

ajangshiba lemsatep aser iba mangatetep bentettsü atema raraba mesüra kiralongra ajanga masü saka ken o ajanga dang iba ken o bentettsü metetdakja liasü.

Jaishankar-i, kiralongra ya khenyongi magizüktettsüla, ajisüaka Palestine nunger tebilemtsü onük ya bentettsü nüngdak, ta ashi.

Jaishankar-i, "October 7 nü atalokba ya kiralongra tulu lir, iba sülen tatalokbatem ajanga region ajak lenmang balaka nung jajadar," ta ashi.

October 7 nü Hamas kiralongrar 2,000 shi Israel telungi ia amakba sülen kiralongra aitsür mezüngbur lenirtem rongnung Ato kilonser, Narendra Modi densema liasü.

Iba tatalokba sülen Israel-i rara ayonga Hamas telok anema raradang tang tashi nung Palestine nunger 9,488 shi süogo.

Chhattisgarh nung assembly election jakdang BJP lenir ka tepset

Raipur, November 05 (Agencies): Chhattisgarh nung assembly election agitsü anogo asemnü dang lia Honibar aonung Narayanpur district nung Maoists telungpurtemi BJP lenir ka tepsetogo, ta Amongnü police-i metetdaksü.

Police-i ashiba agi, Narayanpur district kübok Kaushaltar area nung BJP candidate ka atema nüboyimtsüba mapang nung Maoists telungpurtemi Ratan

Dubey tepset. Dubey-i telok ka den jembiba mapang nung Maoists telungpurtemi po agi pa tepset. Dube ya Narayanpur nung BJP district unit Tir liasü.

Tenük kuli alirtemi ashiba agi, Dubey-i lokti ka den jembiba mapang nung nisung ana arua po agi pa kolak nung koloktsü. Dubey-i pa gari alileni jena oa gari telungi atutsü lia ano nisung kari pa longbanger techira oset agi pa yiruja tsüngset.

Pa tepsetba sülen police iba tesem jagi ao saka tang tashi nungbo shinga mapu.

November 7 nü Chhattisgarh nung assembly election mezüngbuba shilem nung Narayanpur densema assembly menden 20 atema election agitsü aser election tanabuba shilem November 17 nü agitsü.

State BJP Tir, Arun Sao-ibo iba atalokba atema Bhupesh Baghel-i aniba Congress sorkar aitsüogo.

Indian High Commissioner-i Canada dang Nijjar tepsetba kuli meshir

New Delhi, November 05 (Agencies): Canada nung Khalistani lenir, Nijjar tepsetba nung India-i shilem agia lir, ta Canada-i official süa aitsüba sülen India High Commissioner to Canada, Sanjay Kumar Verma-i, Nijjar tepsetba nung India-i shilem agia lir ta tai tongloktsüba atema kuli agüjang ta pai Canada dang shiogo, ta metetdaksü.

Interview ka nung jembidang Varma-i, "Iba ken o bushisüngdangba nung onoki parnok yaritsüsa osang tejangja mali," ta ashi.

"Kuliji kong lir? Iba ken bushisüngdangba maparen tembanger asü?" ta pai asüngdang.

"Temaba ketdangser kati, iba ken o nung India mesüra India nunger agent temi shilem agia lir ta tai tongloktsüogo," ta Varma-i ashi.

Taküm September ita nung Canada Ato kilonser, Justin Trudeau-i Khalistani lenir, Hardeep Singh Nijjar tepsetba

nung India-i shilem agia lir, ta tai tongloktsüba sülen Canada aser India na tsünga tesendaktep kanga mejungi kümogo.


2020 küm June ita nung India-i Nijjar ya kiralongrar ka, ta sangdonga liasü aser taküm June ita nung Canada kübok Surrey jila nung mejangjaba nisung kari Nijjar tepset.

Verma-i, tesüiba küm 5-6 tsünga India-i Canada dang nisung kar India-i yoktsü 26 ben tashi mepishia liasü saka Canada-i kecha meinyak, ta metetdaksü.

Paisa Canada nung pa densema Indian diplomatic missions nung inyaker staff tem amokmeren jenjang nung lir, ta metetdaksü.

Honibarnü New Delhi nung osangbenertem den jembidang External Affairs Minister, S Jaishankar-i, India aser Canada tsünga mangatetep ken o bentettsü atema ketdangsertem atema lenmang mali, ta metetdakja liasü.

Bhupesh Baghel-i Chhattisgarh nung Congress manifesto sayaogo



November 05, 2023 nü Raipur nung Chhattisgarh Chief Minister, Bhupesh Baghel-i taruba state assembly election atema Congress manifesto sayaba sülen osangbenertem den jembidang tangokba noksa nung angur.

Raipur, November 05 (Agencies): Amongnü Raipur nung Chhattisgarh Chief Minister, Bhupesh Baghel-i taruba state assembly election atema Congress manifesto sayaogo; manifesto nungji party-i state nung caste census agitsü nangzüka lir.

Manifesto sayaba sülen lokti den jembidang Baghel-i, "State nung maneni onoki takok ngura caste census agitsü onoki nangzüker. Census ajanga Scheduled Caste, tribal castes, backward classes, general category aser minorities ayimjemtsü," ta metetdaksü.

Paisa, caste census agiba ajanga backward aser maongka junga manguba nüburtemi sorkar welfare scheme balala kübok tajangzük angutsü, ta ashi.

Manifesto nungjisa Congress-i 'Rajiv Gandhi Kisan Nyay Yojana' kübok tsük seret 100 nung sen 3,200 latettsütsü, ta aluyimertem dang nangzüka lir.

"Onoki aluyimertem dang loan sentsüh atoktsü aser Rajiv Gandhi Kisan Nyay Yojana kübok subsidy ama tsük seret 100 nung sen 3,200 latettsütsü.

Party-isa electricity unit 200 tashi angati agütsütsü," ta Baghel-i metetdaksü.

"Tetsürtemi gas cylinder 'refill' asüba sülen parnok indang bank account nung sen 500 inoktsütsü," ta paisa metetdaksü.

Hokolbarnü Union Home Minister Amit Shah-ia, state nung caste census agitsüji BJP-i memelungi mali, anungji party telung nung o lemtepba sülen telemtetba agitsü, ta metetdakja liasü.

Raipur nung Chhattisgarh Assembly elections atema BJP manifesto sayaba sülen Shah-i, "Onoki vote atema mesüzükba politics masayar. Party telung nung o lemtepba sülen (caste census) atema telemtetba agitsü," ta metetdakja liasü.

Tawa Bihar Chief Minister, Nitish Kumar-i state nung caste census agiba osang sangdongba sülen linük tesem ajaklen iba ama census agitsü opposition party aikati akhangar.

Assembly menden 90 aliba state nung election shilem ana lemsar agitsü; November 7 nü assembly menden 20 aser November 17 nü menden 70 atema election agitsü.



November 05, 2023 nü Ato kilonser, Narendra Modi-i Dongargarh (Chhattisgarh) nung Chhoti Bamleshwari tekülem ki semdangba mapang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, YIMPOKSÜI (YIMPOKSÜI) 06, 2023

Menoknok shitakba anakra koda ?

Nagaland State Disaster Management Authority (NSDMA) purtemi kum shia asen lima nunga alima lendong tulu atalok ka asununga lendong timtem nung alirtem kumzuka anepalutsu asoshi terenemshiba sentong akar. Aji oda, takum kuma taoba hopta nung parnok i anogo ka agiteta state ajaklen district headquarters-tem nung asen lima nung menoknok tulu anoka nisungtem lendong timtem tajurudak ama bilema yaritepba sentong ka agiogo. Iba sentong temer anogo tananububa, yakanu November 4 nu Nepal nung menoknok tuluka anoka nisung noklang tema asuba osang angashidang, aji Nagaland nung anak ka asua Disaster Management purtem to agi asangsang nung lendong timtem nung alirtem yaritetla asu (?) ta shisabolua bilemogo. Yakanu Nepal nung anakba menoknokji tashi asadangba nung 6.4 Richter scale magnitude liasü aser November 2 nu Nagaland nung NSDMA purtemi yariteptsu tendangba menonok lendongji Richter scale 7.1 liasü. Aji oda, Nagaland nung NSDMA purtemi bilema tendangba amaji shitakba Nagaland nung menoknok magnitude 7.1 tashi anak ka asua Nepal nung anakba menoknok dang nungi kanga agia tesashiba süla. Nepal nung yakanu 6.4 magnitude tashi nung anakba menoknok agi ki aika raksatsüogo aser item kitemji chirepa nisung aika nembangbatem rongnung nisung tasur noklang ana shi liasü aser yamaji teyirurtema aika liasü. Nepal lima ya asen lima nungi talangka pilar masu asenok ya ali tema nung tenem tekong agi aser ali telonglen tzüim agi anasatepa dang sendaktepa lir. Iba jagi Nepal lima nung tang amaji menoknok tesashi anokdangbo asenokia meteter. Aji oda, Nagaland yaa alima nung menoknok tesashi anoktsüba tesemtem rongnung zungsema lir. Tang tashi nung alima nung tashitemeteteremi tzunglu kodang koma arutsu aser yipru kong koma aittsu, itemjibo tesem, anogo aser mapang tejangja shitetter, ajisüaka menoknok anoktsu indang yabo metakzütetter. Iba jagi balaka asenok inyaksangshi ajak nung teti renema alitsü nungdaker. Atangji, menoknok lendong nung kumzüksü asoshi asenoksasa renema alitsüba mapatem aika lir, ajisüaka tongtibangtibaji asenoki yangluba kitem ya asütsü. Asenoki metettsüba kaji, menoknok ya tetsübuttsüka asüyonga menoknok anakba kija agibo nisung metepseter saka menoknok anokdang kiojen chirepba agi nisungtem lendong tulu ajurur. Idangji, pei ki agi nembanga kinungertem ajak asur, yirur aser ano nisung aika ki chirepba telonglen nung jagi madoktet kangshir. Tangjia Nepal nung asurtemji menoknok anakba agi masu saka menoknok anokdang kiojen chirepba lendong nung asuba purtem lir. Tamalen Gujarat aser Nepal nung nisung meyirijang dak tema menoknok lendong asurtemjia kasa menoknok agi masu saka kiojen laoba mesura chirepba agi ajuruba lendongtem liasü. Atangji, menoknok anoka ali ana kuma sadangtsüa akok mesura ali tema tzüim telongi alutsüa akok, ajibo asenoki menokdangtet. Ajisüaka, menoknok anakba asenok lendongi maitsüsa asenoki inyaksü akokba mapa tongtibang kaji, asenoki yangluba kiojen ya menoknok sashisashia anakba mechireptsüsa yanglutsüla. Tanu asung balaka asenok aikati long ki talanglang amentepa yanglur aser ibaji kiojen yanglu meteter mongin nisung teyari magii asensasa aseni aginüba ama yanglur. Idakji lendong tulu keta lir, kechiyong kiji junga amendaka melira teraka anakshitsü nung laoadoktsü, ano kiji lenden metong mesütepra ajia tera anakshitsü nung laotsü, ano tongtibang kaji ki yangludang lisem, cement aser yin shitak magira kiji tashi maittsü, anungji menoknok tera anokdangyongi laoadoktsü. Ki laoba nung yabo ki kibur aser kidang alirtemji dang masu saka kidang-kiyongertema dena lendong lir, kechiyong asen ki laodangji tangar kidanger ki dak kongshitsü aser parnokjiang lendong tuluba ajurutsü. Kasaji, lenmang nung apu tulu aser talang temdanga alirtem ya shitak yanglua melira, idakjibo aji ajanga süia alirtem dena aika lendong ajurutsü. Item ajakji bilemdanga lendong matalokdangyongi jelia ki kibur, kidanger, kiyonger, lokti aser government-i kanga süoki ia anepalutsüla.

OLEMSABANG

Tsüngrem tenzüker takum ka koma alitsüla

~ L. Kika Pongener.

Tsüngrem'er mapa nung tenzükeritemji nisungi tenung jateta shimer, saka aji Tsüngremi nisung kar mulongjang nung jembia, parnok ajanga tenung jateta shimteter, aser aji Tsüngremi shimtetba...ta agizüker. Anungji Tsüngrem tenzüker/arogo tenzüker ajaki arogopurtemi aser Tsüngremi tenung jateta shimtetba ama, Tsüngrem mulong chidaktsütsüsa aser Tsüngrem tsüngdang/arogopur tsüngdang sentsüh masütsüsa bendanga agütsür tenzüksüla. Ano Tsüngrem tenzüker/arogo tenzüker ajaki, Tsüngrem tenzüker ka ama takum libaliro, jaklaliro, jembishinu yimya ajak nung tazüokba takum asütsüla, aser pa/la dak tangar memettsüdaktsüsa ajemalua tila kuma litetba takum asütsüla. Atangji, Tsüngrem tenzüker kaji nuburtemi akümtsübuttsüsa takum mapa agi liteta sayutsüla. Tsüngrem oi ashir, "Anungji onok Khrista tenzükeritem ama, aser Tsüngrem mim o ketdangsertem ama zungshiangma. Ano ketdangsurtemji temulong lemtetbapur asütsü akhanger" (1 Korint-4:1-2).

Tsüngrem mapa/wadang kechi sudir suaka ajungaji temeshi lir, anungji arogo nung tenzükerba-jia temeshi mapa...ta angateta, kanga kümdanga tenzüksüla. Tsüngrem mapa/arogo mapa nung teka amtaka inyaksü metenzükdang, asen dak yimya supaba memeshiba mapatem aser achi-ajem/chidiyungdi mazüoktetba kar lira, tamasa itemji endoktsüla. Mosa san nuka alidang, par nuburtem alar tia nungi aniteter Kannan limai aotsü atema, Tsüngremi iba mapaji nungloktsünur. Anungji sungsempok ka nung milak jangrua, Tsüngremi Mosa den jembia...Saka Mosa dang Tsüngremi yagi anasa taru, tamasa ne tetsung nungi tsüngsem semzükang, kechiyong koba ali nung na nokdaka lir, iba aliji 'Temeshi lir'...ta ashi (Anitet-3:1-5). Ibaji mesuka, Tsüngrem mapa aser arogo-ji Temeshi lir...Anungji iba nungji tenzüksü atema...Asenok dak achi-ajem/chidiyungdi mazüoktetba aser libaliro masungtetba kar lira...Tamasa itemji sepzüka endoktsüla/melenshitsüla.

Tsüngrem lar/arogo nung tenzüker kaji, pei kibong jungjunga yimsu sutetba aser pei chirnur azüoka yutetba takum asütsüla. Tsüngrem lar/arogo nung tenzüker takum aser kibongji nubur ajak nukrangdong lir, anungji inyakyim ajak nung tashi angaa litetba/anitetdakba tenzüker/tenzükla ka asütsüla. Tsüngrem lar/arogo tenzüker ka dak, nubur memettsüdaktsüsa, libaliro ajak nung kümdanga/azüoka alitsüla. Tsüngrem lar/arogo tenzüker kati sentep-senji ajak nung meranga adentsüla, lokti-senden/mungdang (Meeting/Fellowship) ajak nung tashi angaa adentsüla. Aji oda, tenzüker/tenzükla ajaki pei mapa nung tapok mepadaktsüi/tamakok maludaktsüi, tadentsüla tim ajak nung tashi angaa adentsüla. Tsüngrem oi ashir..."Anungji arogo tanükerji...Pei kibong jungjunga yimsusutetba, pei chir ret-reta azüoka yutetba nisung asütsüla. Kechiaser pei kibong yimsusutsü memetera, pai koda Tsüngrem'er arogo acha-ayangtsü" ? (1Timoti-3:4-5). "Ne sasa kechisarena nung mapa tajung tatishitsü sayuang" (Tita-2:7). "Tashi angabaji tetepsetba tenla dang nungi tajungba" (1 Samuel-15:22).

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



November 5, 2023 nü Nükmen Baptist Arogo, Darogapathar, Dimapur nung World Sunday School Day amongba sülen tesayurtem aser Sunday School tanurtem tangokba noksa nung angur.

Intl' Day of Prayer nung Khristan adianutem atema sarasademtsüogo

November 05, 2023: November 05, 2023 nü International Day of Prayer nung alima tesem balala nung reshikangshi tia nung aliba Khristan adianutem atema sarasademtsüogo; iba anogomong ya küm shia November ita mezüngbuba Amongnü amonger.

Iba anogomong nung reshikangshi tia nung aliba Khristan adianu aser aianutsürtem atema sarasademjang, ta Khristan charity telok balalai jelia sangdonga liasü.

International Day of Prayer for the Persecuted Church ya küm shia World Evangelical Alliance-i Khristan melungtet telok balala den senteper ayongzüka arur.

Linük 60 dak tema nung Khristantem reshikangshiba asadangba telok- Open Doors-i ashiba agi, tang alima tesem balala nung Khristan million 360 shibo reshikangshi tia nung lir.

Open Doors indang World Watch List report ajanga ashiba agi, yaküm alima tesem balala nung Khristan yimsü amangba atema tepsetba Khristan 5,621 liasü aser iba nungjagi shilem 90 bo Nigeria kija nung tepsetba liasü.

Arogotem nung International Day of Prayer amongtsü atema Open Doors U.S. aser Voice of the Martyrs densema Khristan organization aikati sarasadem leniba densema resources aika lemsatepa liasü.

November 05 nü International Day of Prayer mongogo, ajisüaka sentong balala aliba ajanga iba anogo nung IDOP sentong magitetba Arogotemi November ita Amongnü mashie anogo ka nung iba sentong ayongzüka agitsü metetdaksüogo.

Voice of the Martyrs USA nungi Tedd Nettleton-i, "Na Arogo ka nung lenir süra aser nai November 5 atema tanga sentong kar renemer lira nai November 12 mesüra November 19 anogotem nung iba (IDOP) sentong ayonga agitsü akok. November ita nungsa ner Arogoia alima nung reshikangshi tia nung aliba Khristantem atema sarasademjangma," ta ayongzüka liasü.

Tening Village Baptist Arogo nung World Sunday school day among



November 5, 2023 nü Tening Village Baptist Arogo nung World Sunday school day anogomong nung graduate asür ana den Sunday school tesayurtem tangokba noksa nung angur.

Dimapur, November 05 (TYO): Nagaland aser alima tesem balala nung Arogotem den külemi November 5 nü Tening Village Baptist Arogo nunga World Sunday school day mongogo, ta Rutmakbo Media cell Tening Village Baptist Church-i sangdong ka ajanga metetdaksü.

Rev. T. Nagi leniba nung NBCC team-i ketdangsüa iba sentong agi.

Tazüngkunem 6:2 nung ajemdaker jembidang Rev. T. Nagi-i, tanü asen lokti nung tasü itta Kibuba tenzüksü aser ochiba den temeshi taküm

alitsü nüngdaka kümogo, ta ashi.

Rev. T. Nagi-isa pei taküm lenmang nung jajadang kanga kümküma alitsü aser ajak nung Tsüngrem tama südaktsütsü ayongzüik.

Paisa tsüraburtem danga tanurtem tarutsü jenjang nung rangloktsüla aser Sunday school tanurtem atema awareness sentong aika katsütsüla, ta ashi.

Iba anogomong sentong nung Tening Village Baptist Church Men's Society-i Sunday school tanur ajak nem kakat den pen agütsü.

Tening Village Baptist Church nung Sunday School tanur 356 lir aser iba nungjagi tanü tanur 26 graduate süa youth department nung züngokogo.

Rev. Ramriwanbo Pastor-i senior class nungi tanur 26 nemji graduate asüba certificate agütsü aser Sunday school superintendent Kr. Kibunne-i parnok dang Tsüngrem tenzükw wadang nung meshiteta alitsü ayongzüka liasü.

Kasa sentong nung Rev.T. Nagi leniba nung NBCC team-i ken tajung ka aten.

ANOGO ABEN TSÜNGREM DEN

Ne Mulungjang Tsüngrem

T.Ken 147: 1-11

Petinumem Tsüngremji temulungjang teraksa Tsüngrem lir. Iba indang Dawidi tekong asem aser pezü nung asenok dang ashir. "Pai temulungjang teraksa aneptsür, aser parnok zübu alentsür. Pai petinu yongsük sükdanger; Pai parnok ajak nem tenüng agütsür".

Item tekong ana nung asenok kotak aser temulungjang teraksa metemdangba angur- asenok tasü aittsüla. Tsüngremi anüngtemji yanglu. Pai jembi aser Pai jembiba ama adok. Pa teyangluba akanga noktak. Tsüngrem shibai anüngtem yanglu Pai ne mulungjang teraksa atema bilemstsür. Tangaribo mebilemstsütsü akok, saka Tsüngremibo bilemstsür. Pai ne mulungjang raksaba mangutsüsa Pa talangka nung mali. Na kodang timatemer, ajeper aser teyari bushir Pa angüma malutettsüsa kanga tulu masü.

Au, kotaktem Tsüngrem ne mulungjang terakasa Tsüngrem lir. Tsüngrem shibai Petinumem sükdanger aser tenüng jatsür, Pai ne nüngdaktem metet. Pai ne indang ajak metet, aser Pai ne nüngdak ajak agütsütsü akok. Tsüngrem shibai ita Petinumem ajak peipei leman nung odaktsütsü akok. Pai ne mulungjang teraksa ajak bentener ne nem agütsütsü, nai dang Pa nem agütsüra. "Asen Kibuba tulu lir, aser ain nung tashi tulu lir; Pa tangatetba tatem maka" (t.5). Pa temeim aser tangatetba tatazük maka. Pa tashi tulu lir. Nüngdak ajak Pai inyaktsü akok.

Shibai petinumem arakzüdaktsür kasa jagi ne nüngdaktem repranger. Tsüngrem temeim, Pa tangatetba mesüra ain nung telemtet mali. Tanü na ne mulungjang raksaa lira, Pa nem agüjang aser Pai na aneptsütsü.

Kandhamal rara nung asür Khristan 35 nem tetushi agütsütsü

November 05, 2023: 2008 Hindu swami ka tepsetba küm Odisha state kübok atema Khristantem nem tai Kandhamal nung Khristantem anema apusodang tepsetba apusoa liasü, ajisüaka Khristan 35 nem akhüm tetushi agütsütsü Vatican-i temelaba agütsüogo.

2008 küm August ita nung Kandhamal district nung October 25 nü Khristantem anema apuso aser iba raraji district 14 nunga prokshia liasü.

Right-wing Hindu züngsemtemi anir Khristantem anema apusoba sülen ita asem tsüngda Khristan 100 dak tema asü, nisung meyrjang aika talidak makai arem nung jenoka liasü. Ki 6,000 aser Tenla ki 300 dak tema raksatsü aser nisung 50,000 shi prokshia liasü.

Vatican-i Cuttack-Bhubaneswar archdiocese nung Archbishop, John Barwa dang Kandhamal nung Khrista atema asür 35 nem tetushi agütsütsü mapatong tenzükwang ta melaba metetdaksü.

2008 küm Kandhamal rara nungji Kanteswar Digal densema Khristan 35 asü.

Hindu swami ka tepsetbaji Maoist telungpurtem ajanga liasü, ta bushitet.

October 25 nü osangbenertem den jembidang Archbishop Barwa-i, October 18 nü pai Papal ambassador in India, Apostolic Nuncio Archbishop Leopoldo Girelli ket nungi shidi ka angu, aser iba shidi nungji Vatican Dicastery for Causes of Saints-i Kanteswar Digal den Khristan 34 "Kandhamal nung Khrista atema asürtem" nem tetushi agütsütsü maparen tenzükwang, ta metetdakja liasü.

2008 küm September 25 nü right wing Hindu züngsemtemi Kantheswar Digal dang Khristan yimsü tokjang ta ashi, saka pai magizükba agi reshikangshia tepseter ayong ka nung tasü mangji toktsü.

Khrista atema asürtemji tebur 24 aser tetsür 11 lir.

AO OSHI ANGAZÜKDAK: TANÜ ANGAZÜKTSÜBA OJANG



Sayutsüngi

(v) sayu o ashi, ajungshi (preach)

* Tenla kidang sannükeri sayutsüngi .

Sazü

(v) teruru, chinüa dang aliba (devouring)

* Temang nung tashidak agi sazüa aitdaksür.

OLONG PAITEP # 6687

15x15 crossword grid with numbers 1-19.

TIPIEN

- 2. Teburtemi tejak nung awaba - (8)
6. T ___ em - (3)
8. Tzüük ayudak - (3)
9. Nüngdakba dang timba - (6)
11. Züina ao - (4)
12. Yañgi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6686 TELANGZÜBA

TIPIEN :

- 1. Telok, 4. Aluru, 6. Ozüng,
8. Emk, 9. Kin, 10. Teti,
12. Süir, 13. Jen, 14. Ola,
16. Talak, 17. Mazük.

LANGTSÜNGLEN :

- 1. Tenükjang, 2. Luden,
3. Kioktsü, 5. Lenti,
7. Tajangzük, 11. Teronem,
12. Sempa, 13. Jahaz.

NAI-A YA METETTER MA

ICC WORLD CUP 2023 NUNG 6 TIMTIBA AZÜKERTEM KAR YAMAI :

Table with 3 columns: Player Name, INNS, 6S. Lists players like David Warner, Rohit Sharma, etc.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :



November aser December ita Meghalaya kübok Umroi nung United States aser Myanmar Army-i Indian Army den joint military exercises agitsü. Iba sentong ya Joint Training Node (JTN) nung agitsü aser Malaysian Army-ia tawa tu iba mesükba exercise ka agiogo. Umroi JTN ya Indian Army nung Eastern Command indang nominated node lir aser ib tesem nung bendanger linüktem den joint exercises agia arur. Tesüiba küm 7 tsüngda Umroi JTN ya international Army joint training centre ka kümogo.

Arunacha-i Gulf linüktem dangi naring aser aonsotsü yoktsü

Itanagar, November 5, 2023 (Agencies): Arunachal Pradesh sorkari Dubai nung amenoka aliba company ka dangi agriculture & allied sector products yoktsü tenangzüktep agiogo.

Arunachal Pradesh Agriculture Marketing Board (APAMB)-i New Delhi nung Dubai nung amenoka aliba Lulu Hypermarket den memorandum of

understanding (MoU) ka nung sign sütepogo.

"APAMB-i Lulu Hypermarket LLC, Dubai, UAE den küm pungu atema MoU sign sütepba atema pelar" ta Chief Minister Pema Khandu-i ashi.

Iba tenangzüktep ajanga Gulf linüktem dangi naring aser aonsotsütem bener yoktsü. MoU ajanga asen aluyimertem nem maangka

agütsütsü aser parnoki aliba jenjang nung shishilembatsü, ta CM Pema-isa ashi.

Lulu Hypermarkets ya company tulu ka lir aser alima tesem balala nung hypermarkets 200 tema lapoka lir aser küm shia USD 8.5 billion aazüker.

APAMB CEO Okit Paling aser Lulu Hypermarkets CMD Zulfikar Kadavath nati MoU nung sign sütep.

Assam nung sorkar mapa 40,000 adoktsü: Minister Hazarika

Guwahati, November 5, 2023 (Agencies): Assam nung BJP-i aniba sorkari taruba küm ka ser tesadang tsüngda sorkar mapa 40,000 adokdaksütsü ta cabinet minister Pijush Hazarika-i ashi.

"Chief Minister Himanta Biswa Sarma-i Assam nung lanur 87,000 nem sorkar mapa agütsütsü nangzükba inyakogo" ta Hazarika-isa ashi.

Sorkari lanurtem ochimashi nungi agientsü aser süpokrem kecha melii sorkar mapa agütsütsü nangzükogo ta paisa shisem.

Assam nung kibong lakh 27 Arunoday scheme kübok lir. Taruba küm ana tsüngda Arunoday scheme kübok ano kibong teimba dendaktsütsü, ta Minister Hazarika-isa metetdaksü.

Aatmanirbhar scheme kübok mapa manguba lanur lakh 1 shi nem Rs 1 lakh nungi Rs 5 lakhs agütsütsü aser iba ajanga parnok entrepreneurs akümtsü, ta Hazarika-isa ashi.

Himanta Biswa Sarma-i ketdangsäba sorkar ajanga Assam nung Congress sorkar mapang medical college 6 aliba nungi 12 kümogo, ta paisa shisem.

Mizoram nung BJP-i menden aika nung takok angutsü: Kiren Rijiju



Kiren Rijiju

Aizawl, November 5, 2023 (Agencies): BJP-i Mizoram election nung tongti shilem agir ta Union Minister aser BJP lennir Kiren Rijiju-i ashi.

Mizoram assembly elections atema nüboyimba tatemba anogo nung pai iba olen jembi.

Rijiju ya BJP Mizoram election in-charge lir aser pai ashiba agi tan election ya Mizoram nung election balaka

asütsü.

BJP tashi tulu lir aser assembly menden balala nung takok angutsü, ta paisa ashi.

"Mizoram nung tanü election nüboyimba tatemba anogo lir. BJP-i tang mezüing atema Mizoram nung tongti shilem agir anungji iba Assembly election ya khenyongi balaka asütsü. Tesüiba nung BJP-i menden ka mesüra ana nung takok angutsü

merang saka tangbo onok tashi tulu lir kechiyong menden aika nung takok angutsü" ta Rijiju-i metetdaksü.

"Prime Minister Narendra Modi-i Mizoram nung alirtem akasodaktsüogo anungji nübortemi BJP dak tamang akar. BJP-i menden aika nung takok ngura sorkar akümba nunga shilem agitettsü" ta paisa ashi.



Nov. 05, 2023 : Nepal nung menoknok ajanga ano teraksa jenti bener arutsüogo. Honibar aonung menoknok asadangba magnitude 6.4 anoka Nepal nung nisung 157 takum samaba sülen yimdaklir meyrirjang aika sükseta aonung kima mejanga liasü.

2025 general elections matondang menden yutsütsü: Singapore PM

Singapore, Yimpoksüi/Nov. 05 (Agencies): Singapore Ato Kilonser Lee Hsien Loong-i pa menden ya 2025 general elections matongdang tang yimsü tesüdak People's Action Party (PAP) nem amoktsütsü ta shiogo.

2024 küm November ita PAP küm 70 jungli Deputy Prime Minister Lawrence Wong nem menden melenoktsütsü ta arishi küm 71 tain Lee-i Deobarnü ashi.

Deobarnü PAP züngsemtem den jembidang, pandemic mapang Wong ya sorkar meyong COVID-19 task force nung tekolakba ama inyaka liasü aser yimtenren melenshitsu asoshi kuli kecha mali ta Lee-i ashi.

"Anungji taruba general election matongdang ni DPM

Lawrence nem amoktsütsü tebilemba lir," ta Lee-i ashi. "Iba sülen ni ato kilonser tassenba molung asütsü. Pai amshinülen ni aotsü. Taruba general election nung tokteptsü aser takok angutsü asoshi ni akok tashi tajungtiba nung pa aser par telok yaritsü."

Wong ya taoba mapang finance aser national development minister inyaka liasü aser Singapore nung COVID azüoktsü merangba ketdangsüdag nüburtemi meteta akum, kechiaser iba tashidak tenzükdang alima nung shiranger aser asü-amar tajemtiba linüktem rongnung Singapore ya ka liasü.

PAP yagi Singapore nung küm 60 dak tema yimsü süa arur.

2020 election nung PAP

yagi parliament menden 93 aliba nungi menden 83 nung takok ngua liasü aser ibaji opposition asoshi takok tulutiba liasü.

1990 aser 2004 tsüingta Goh Chok Tong-i yimsü asüba sülen Wong ya Lee kibong nungi masüba Singapore lenir tanabuba alitsü.

Lee Hsien Loong tebo Lee Kuan ya iba city-state founding father aser ato kilonser mezüngbuba liasü.

Ochimashi mapa inyaka tai tongloktsüba aser nüktabangtaba mechi yimsü tesüdak party nungi züngsem asem anenba sülen küm tetenzüklen Singapore nung yimtenren tsütsü mepetmesü adoka liasü, koba tesüba mapang majangshidangba ka liasü.

Alimai Israel-Gaza rara dak rangloker: Zelenskyy

Kyiv, Yimpoksüi/Nov. 05 (Agencies): Israel-Gaza rara ajanga Ukraine nung raraba senzuka yutsür, ta Ukraine Tir Volodymyr Zelenskyy-i ashi.

Ibai Russia indang nükjidongtem rongnung ka liasü, shirnoki tashi ajak amshia February 2022 nungi tenzüka Ukraine maka arur.

Ukraine-i south tsütsü meyiper amakba nung tang tashinung terenlok kangabo mali.

Iba yongji Kyiv tembar linüktem rara agi alaktsü akok ta tsübo ba bilemer, kechiaser linük kakri Ukraine nem maneni advanced weapons aser senotsü agütsütsü nungnangba tali akumer.

Ano Honibarnü Ukrainian Defence Minister Rustem Umerov-i ashiba agi, 128th Mountain Assault Brigade "Zakarpattia (Transcarpathia)" nungi Ukraine sepaitem tepset aser iba atema bushisüngdangtsü pai totuyuba agütsüogo.

Hokulbarnü southern Zaporizhzhia region nung Russia nung missile ka agi amak ra Ukraine mitkar temi ashir aser pai sepa kwi asüar mashi.

Raraba tesem anasa yimtsüng ka nung sempet agütsüba sentong agidang Ukrainian service personnel 20 dak tema tepset, ta Ukrainian media aser Russian military bloggers temi shia liasü.

Ukraine mitkar temisa

Honibarnü Crimea nung rong yangluba tesem ka takok ngua amak ta ashi, koba Ukraine south tsütsü tzü agi meketbanga aliba tesem ka lir aser 2014 küm Russia-i ozüng alema rakzüka liasü.

Crimea anüdoklen Kerch yimti nung rong yangluba tesem nung Ukraine nungeri missile 15 khaloktsüba nungi 13 khazüka yok aser Russia nung rong ka raksatsü, ta Russia indang defence ministry ajanga shia liasü.

Honibarnü Kyiv nung European Commission President Ursula von der Leyen den jembidang, "Middle East nung raraba ajanga Ukraine nung ranglokba bener aor," ta Zelenskyy-i ashi.

Russia-i iba rara nung ranglokba tashi maitba kumdaktsünü, saka ajak asen tashi nung lir, ta pai ashi.

Ukraine indang chief military commander Valery Zaluzhny-i rara ya tejakleni maotsüsa jenjang ka atonger aser iba ya ajanga Moscow ajangzüka par mitkar tashi yanglushitsu ta asadangtetba indang Zelenskyy dang asüngdanga liasü.

"Nisung ajak anibeleva akumer aser tangatetba balala lir. Saka tejakleni moi anendakabo mali," ta pai langzü.

Russia-i anüng amokbanga lir aser tensa melentsü asoshi Ukraine-i tekeratiba nung US-i yangluba F-16 warplanes aser advanced anti-aircraft defences nungdaker, ta pai ashi.

US Secretary Antony Blinken-i Palestine Tir Abbas den ajurutep

Washington, Yimpoksüi/November 5 (Agencies): US Secretary of State Antony Blinken-i, Deobarnü Israel-i atsünger aliba West Bank semdanga Palestine tir Mahmud Abbas den ajurutepba Palestine nung ketdangsürtem sayaba noksa ajanga nguogo.

October 7 nü nungi tenzüka Gaza nung Israel aser Hamas na rartepba den külem West Bank nunga azütokshi lendong tali kuma aoba ajanga alimakintemi shisabulua bilemba mapang Blinken-i Ramallah nung Abbas den ajurtepogo.

October 7 nü Hamas puri ajungbena southern Israel maka nisung 1,400 tepsetba sülen Israel aser Hamas na raratep tenzüka liasü. Israel nung ketdangsürtemi ashiba agi, asürtem ya timba civilian tem liasü.

Rara tenzüka sülen Israel nung sepaitemi, ali, anüng aser tzüyim ajanga Gaza maka arudar aser iba mapang nisung 9,500 shi tepsetogo, ta Hamas-i achayangba health ministry-i ashi.

Rara tenzüka sülen Blinken-i Israel asem ben tashi semdangogo aser iba den Arab linüka aika semdangogo.



Ajisüaka October 7 nü tang mezüngbuba pai West Bank semdangogo.

Security dak sendakba nung tebilemstü aliba ajanga Blinken-i West Bank semdangtsü aliba indang osang jelia memetdaksü aser pai Jordan aser Hokulbarnü Israel semdangba sülen Deobarnü West Bank semdanga liasü.

Jordan chuba Abdullah II den ajurutepba sülen Blinken-i, West Bank nung azütokshi lendong tali kuma aoba süoki ia agiba lemsatap aser iba tesem nung partner tem den longjemer teti asoshi yimjung bener arutsü atema US bendanga agütsür

aliba lemsatapa liasü.

Rara tenzüka sülen Israel nung sepaitem den raratepba aser West Bank nung aliba Israel nungertemi amakba mapang Palestine nung 150 dak tema tepsetogo, ta Ramallah nung amendaker aliba Palestine nung ketdangsürtemi metetdaksü.

Washington-i, Israel nem yimden yimsütsü aser military teyari agüja aruba mapang ka nung Blinken-i Abbas ajuruogo. Abbas-i aniba secularist Fatah party ya Hamas anemertem lir.

United States-i ashiba agi, Israel aser Palestine na

mangatettep adoker aliba ya state ana kuma lemdangba ajanga dang bentettsü.

Blinken-i tawa ashiba agi, Palestine nung ketdangsürtemi Gaza Strip azüoktsüla koba tang Hamas puri yimsüsdar.

United States aser Europe aser Arab linüktem aika aser United Nations-ia, West Bank nung tensa mejungi akümba atema shisabulua bilemba lemsatepogo.

Israel indang army-i Hokulbarnü ashiba agi, parnoki Jenin aser Nablus nung Hamas pur anema jenjang agia arudar. Blinken-i Middle East

semdangba mapang civilian tem kümzüka ayutsü aser Gaza nung alirtem nem teyari agütsütsü atema rara khen atema anena atatsü asoshi jenjang agitsü asoshi benokogo.

Kasa mapang nung Honibarnü aonung menor Israel-i central Gaza nung refugee camp ka amakba sülen nisung 30 dak tema tepsetogo, ta Hamas indang health ministry-i ashi.

"Al-Maghazi camp nung asür 30 dak tema Deir Al-Balah nung Al-Aqsa Martyrs Hospital-i anir aruogo," ta health ministry otongdar Ashraf Al-Qudra-i sangdong ka ajanga metetdaksü. Hamas-i telegram ajanga, Israel-i nüburttem ki indang indanga amak ta ashiba den, asürtem ya timba tetsür aser tanurtem liasü.

Israel indang military otongdar kati ashiba agi, iba tesem nung bomb pokloktsüba mapang nung Israel Defense Forces inyaksangshia liasü asü masü iba indang bushisüngdangdar.

October 7 nü Israel amakba atema Hamas pur samatsütsü Israel-i nangzükgogo aser tang Gaza kanga mejungi amakba mapang ka lir.

Capt Kenguruse Memorial Trophy: Holy Angels, St Xavier's College & Beckon FC nungeri takok nguogo



Kohima, Yimpoksüi/November 5 (TYO): Tang asaya aliba 7buba Late Capt N Kenguruse, MVC Memorial Football Tournament nung Honibarnü Holy Angels Sports Team, Noklak, St. Xavier's College Jalukie aser Beckon Football Club nungeri pei tata asaya kokogo.

Iba asayamung ya Assam Rifles-i ayongzüka Indira Gandhi Stadium, Kohima nung asayadaki.

Honibarnü mezüngbuba asaya nung Holy Angels Sports Team, Noklak-i goal 5-3 agi A Yhome FC kokogo.

Asaya nung A Yhome atema Thejasetuo-i minute 14buba nung mezüngbuba goal idaktsü aser iba sülen ano paisa minute 30buba nung penalty ka ajanga tanabuba goal idakja liasü. Ajisiüaka Holy Angels puri asendenshir asaya aser asaya mezüngbuba shilem matem tsüngda Lonkhoi aser Tangsoi

nati minute 33 aser 39buba nung goal kaka idakja goal kasasa aküm aser iba sülen ano Muthuia goal ka idakja liasü.

Asaya tanabuba shilem nung A Yhome nungi asayar Vilhoubeituo-i minute 57buba nung par team asoshi tasembuba goal idakja maneni goal kasasa aküm, ajisiüaka Lonkhoi-i minute 80buba nung pa asoshi tanabuba aser Holy Angels asoshi goal pezümba idaktsü aser mapang apuloktsür asayaba mapang Lamsong-i goal pongububa idakja parnoki asaya akok.

Tanabuba asaya nung St Xavier's College Jalukie-i goal 2-1 agi Peace United FC koka liasü.

Asaya nung mezüngbuba goal ya St Xavier's College atema Ipeuwangbe-i minute 26buba nung idaktsü aser asaya tanabuba shilem nung ano Eshibe-i minute 44buba nung par team asoshi tanabuba goal idakja liasü. Asaya nung Peace United-ia minute 45buba nung

goal ka idaktsü ajisiüaka tanabuba goal magütsüteti asaya makok.

Honibarnü tatembangbuba asaya ya Beckon FC aser Vanguard Academy na asaya koba Beckon FC-i goal 3-2 agi koka liasü.

Asaya nung mezüngbuba goal ya Beckon FC atema Veyi-i minute 34buba nung idaktsü aser Kozo-i minute 54buba nung tanabuba goal idakja liasü. Ajisiüaka Vanguard nungi asayar Kati-i minute 54 aser 67buba nung goal ana idakja küptok. Telok ana tsüngda kanga toktepa asayaba sülen Kuthoseyi-i mapang apuloktsür asayaba mapang Beckon asoshi tasembuba goal idakja parnoki asaya akok.

November 6 nü asaya:

1. Tiema-Khe Kidima vs Liangmai FC @ 8AM
2. Western Sumi Sports Association vs Medziphema Royal FC @ 1PM.

Tseminyu nung Chess Champion asayaogo



Dimapur, Yimpoksüi/November 5 (TYO): Tseminyu District Chess Association aser Child Welfare Committee, Tseminyu na longjemer November 4 nü 1buba Inter High School Beginner's Chess Champion 2023 kanga takok ngua ayongzüka asayaogo.

Iba asayamung ya Christian School, Tseminyu-i host süa asaya, koba Young Rengma Entrepreneurs aser chess asaya meimertemi nongita liasü.

Iba asayamung nung Mrs. Gwayhunle Tep, SDEO Cum DEO In charge Tseminyu alakteta jaoker liasü. Sentong nung o jembiba mapang Tep-i, school nung chess asaya koda tongtibang iba indang

lemsatepba den tetsür tebur aser tanur tain ta kecha tebandang makai chess asaya ajanga tajangzük angubattem indang lemsatep.

Maneni sempet agütsüba sentong nung Child Welfare Committee, Tseminyu mendenbuba Jetilo Apon-ia, "child rights and school safety" indang onük nung ajemdaker jembia liasü.

Iba sentong ya EGF, Tseminyu tir Kelvin Tep-i sarasademer tenzük aser Christian School Hostellers temi ken tajung ka tena liasü. Sentong ya TDCA Women Coordinator Thonile Seb lenisüba nung agia liasü. Anküp o jembiba mapang Seb-i ashiba agi, iba asayamung ya iba tesem nung aliba

kaketshirtem atema ayongzüksüba mezüngbuba Chess asayamung liasü.

Ajak senteper iba asayamung nung Tseminyu District kübok school tenet nungi asayar 22-i shilem agia liasü. Junior Category ya BHSS nungi Kentye Kent akok aser DBS nungi Benhilo Kesen aser AG School nungi Jochuyhulo Khing na tanabuba aser tasembuba jenjang nung liasü.

Sub Junior Category ya BHSS nungi Miluti Apon-i akok aser tanabuba aser tasembuba jenjang nung BHSS nungisa Yhulonyu Khing aser DBS nungi Methawa Magh na liasü. Bwenlo Kent aser Soruno Magh nati iba asayamung ya achaayanga liasü.

Pakistan nunger asayatem dang senchi achi

Yimpoksüi/November 5, 2023 (Agencies): Babar Azam-i aniba Pakistan team dang Deobarnü senchi chiogo.

New Zealand den Bengaluru nung asayaba mapang slow over-rate atema asayatem match fee shilem 10 senchi chiogo. Iba asaya ya prnoki run 21 (DLS) agi koka liasü.

Honibarnü M Chinnaswamy Stadium nung New Zealand indang innings nung atakzükja aliba mapang nung over ana monmaba atema Pakistan nunger asayatem dang senchi chia liasü.

New Zealand akokba ya Pakistan atema iba World Cup nung asaya ti nung 4buba akokba liasü aser iba ajanga parnok semifinal-i aitsü asoshi timla mesamai kümdaktsüogo.

"Emirates ICC Elite Panel of Match Referees nungi Richie Richardson-i temerenshi agütsüogo. Atakzükja aliba mapang tashi nung Babar Azam-i aniba team-i over ana monmaba sülen temerenshi

agütsüogo," ta ICC media sangdong ka ajanga metetdaksü.

ICC Code of Conduct for Players and Player Support Personnel kübok Article 2.22, koba minimum over-rate offences dak sendaka lir iba temzüng ozüng kübok atakzükja aliba mapang nung monmaba over shia asayatem dang parnok indang match fee shilem pongu senchi achir.

Iba asaya nung New Zealand team mezüng batting amenba sülen parnoki asayar trok out ser run 401 yanglua liasü.

Babar-i aibelenba nangzükogo aser temerenshi agütsüba agizükogo, anungji ken o angadangtsü asoshi kecha nüngdak madoktsü.

On-field umpires Paul Wilson and Richard Kettleborough, third umpire Richard Illingworth aser fourth umpire Joel Wilson nungeria Pakistan team-i aibelenba kuli agütsüogo.

Paris Masters: Djokovic final-i iogo



Yimpoksüi/November 5, 2023 (Agencies): Honibarnü Paris Masters semi-final nung Novak Djokovic-i, 5-7, 7-6 (7/3), 7-5 agi Andrey Rublev madak takok ngua fina-i iogo. Pa final nung Grigor Dimitrov den asayatsü.

Asaya nung world number one asayar yagi mezüngbuba set mekoki liasü, ajisiüaka pai meyipa arur kanga junga asaya takok ngua liasü.

Djokovic, iba asayamung nung semifinal teku tashi nung khen danga tamakok mongui lir aser asaya 17 tashi khen danga tamakok mongui asaya arudar, kong US Open koka Grand Slam 24buba akokba densema lir.

Taoba asaya 31 nung pa khen dang tamakok ngua lir, koba Carlos Alcaraz den Wimbledon final nung tamakok anguba ya asütsü.

Djokovic-i serve ka break süa asaya tenzük ajisiüaka

Rublev-ia taruba game nung serve break süa kasasa aküm.

Iba sülen Novak-i 0-40 agi tesülen aliba game ka nung service kanga junga oteta takok angu aser 4-4 aküm, ajisiüaka taruba game Rublev-i akok aser iba sülen mezüngbuba set koka liasü.

Tanabuba set tenzük mapang tatsüka tsüngda Djokovic-i break point ka kümzüktet saka Rublev indang serve break asütsü asoshi maongka pezüben tashi anguba magiteti liasü.

Asayar ana kanga toktepa asaya arur tie-break nung Djokovic 4-2 agi tejakdang aküm aser iba sülen Rublev-i aoba serve ka kanga junga agizüka pai tanabuba set koka liasü.

Tasembuba set nunga asayar ana kanga toktepa asaya saka Djokovic-i Rublev indang serve ka break süteta pai asaya 7-5 agi koka liasü.

BILEMDANGANG

"Merangdangertemi dang merangzük." "